


TEZĂUR LITURGIC
21 DECEMBRIE

ACATISTUL
SF. IERARH
PETRU,
MITROPOLITUL
MOSCOVEI
ȘI ÎNTREGII RUSII



MOSCOVA, 2000



Акафист

святителю Петру, митрополиту

Московскому, всея России

чудотворцу

Кондак 1

Избранный и дивный в чудесех святителю,
Российския Церкви первопрестольниче, и
усердный о душах наших молитвенниче, отче
наш Петре! В песнях восхваляем тя с любовью,
святаго заступника нашего: ты же, яко имеяй
дерзновение ко Господу, предстательством
твоим небесным, от всяких нас бед свободи, да
зовем ти:

Радуйся, святителю Петре, великий
чудотворче!

Икос 1

Ангелоподобно на земли пожил еси,
святителю отче, и яко ангел благий хранитель
Отечеству твоему явился еси не токмо в житии
твоем, но по честнем успении твоём, благотвори

людем ти сродным, от нихже слышиши
благодарения таковая:

Радуйся, благочестивых родителей плоде
богодарованный;

радуйся, корене благаго ветве многоплодная.

Радуйся, прежде рождения твоего, видением
Божественным рождшей тя во избранника
Божия предуказанный;

радуйся, во утробе матерней освященный.

Радуйся, по рождении твоём благодатию Духа
Святаго просвещенный;

радуйся, сосуде Божия благодати избранный.

Радуйся, святителю Петре, великий
чудотворче!

Кондак 2

Видевше честнии родителие твои, Петре
богоизбранный, яко косно в учении книжном
преуспевал еси, о сем тужаху: сие же бысть по
смотрению Божию, да не от человек, но свыше
от Бога, навикнеши учению небесному;
явивыйся бо тебе муж светел, в святительския
ризы облеченный, рукою коснувся твоего языка,
благословением своим разреши косность твою, и

преисполни тя разума, яко пети тебе разумно Богу: Аллилуия.

Икос 2

Разум небесный свыше тебе даровася, угодниче Божий, имже добре уразумел еси, яко вся красная мира сего скоро преходят: темже, двадесятолетну ти суцу, мир и вся благая его оставил еси, и возжелел еси инок быти и Единому Христу работати. О сем тя хвалим и зовем:

Радуйся, земли Вольнския святое прозябение;

радуйся, всея страны Российския духовная лепото.

Радуйся, восхождения от добродетели к добродетели невидимо совершивый;

радуйся, совершенства о Христе богомудренно достигнувый.

Радуйся, послушания добрый рачителю;

радуйся, смирения Христова верный подражателю.

Радуйся, святителю Петре, великий чудотворче!

Кондак 3

Силою Божию укрепляем, отче Петре, вся послушания монастырская добре проходил еси во обители, и яко звезда богосветлая, сиял еси добродетельми Евангельскими среди братии твоея: темже священства саном почтен был еси, и непорочно возносил безкровную жертву Богу, присно поя Ему серафимскую песнь: Аллилуия.

Икос 3

Имея помысл чист и непорочную душу, Петре богоблаженне, святые иконы изображати научился еси, и был еси изограф благоговеин, дело рук своих посвящай Богу, иже писанныя тобою иконы чудесы многими прослави: сего ради хвалебно вопием ти:

Радуйся, трудолюбче благословенный, трудивыйся во славу Божию;

радуйся, яко труды твоя святые Богом прославлени суть.

Радуйся, божественному евангелисту Луце в иконописании подражавый;

радуйся, иконы Пресвятыя Богородицы благолепно написавый.

Радуйся, в душе твоей образ Божий добре изобразивый;

радуйся, сердце твое в храм Триипостасному Богу посвятивый.

Радуйся, святителю Петре, великий чудотворче!

Кондак 4

Бури страстей избежав, отче Петре, к тихому пристанищу безмолвия корабль души твоя направил еси, и с благословения настоятеля твоего, в месте безмолвнем, на реце Рате, поселился еси, да един Единому Богу поработаеши в посте и молитве, воспевая Ему немолчную песнь хвалы: Аллилуия.

Икос 4

Слышавше людие благочестивии о твоих добродетелех, Петре преподобне, прихождаху к тебе, благословения и молитв от тебе ищуще, ихже любезно принимал еси, и обитель иноческую на реце Рате устроил еси, в ней же спасошася мнози твоим наставлением богомудрым. Темже, яко сотворившаго и научившаго, ублажаем тя и глаголем:

Радуйся, непопустивый погибнути Богом
врученным тебе овцам;

радуйся, устроителю благоискусный
общежития иноческаго.

Радуйся, учителю пресладкий благочестию
христианскому;

радуйся, возшедый на высоту совершенства
духовнаго.

Радуйся, достигнувый глубины смирения
христианскаго.

Радуйся, святителю Петре, великий
чудотворче!

Кондак 5

Боготечное светило быв, волею
Пастыреначальника Христа, на свещнице
церкве Всероссийския поставлен был еси, Петре
богоносне, да светиши Отечеству твоему
земному, и приводиши к солнцу правды люди
российския, научая их благочестно воспевати
Пресвятей Троице: Аллилуия.

Икос 5

Ощутив патриарх Царяграда, святейший
Афанасий, яко благоуханием дивным исполнися

весь храм егда в него вшел еси, Петре
досточудне, позна тя избранника Божия,
достойнаго воистину сана святительскаго, и
постави тя в митрополита Киевскаго, и всея
России: сему же бывающу, просветися лице твое
светом небесным: мы же дивящися таковому
чудеси, вопием ти:

Радуйся, архиерее Божий, от
Пастыреначальника Христа свыше
прославленный;

радуйся, иерарше Христов дарами Святаго
Духа преисполненный.

Радуйся, апостолов преемниче и святителей
сопрестольниче;

радуйся, в Российстей стране светом
благоразумия возсиявый.

Радуйся, паству всероссийскую духовно
удобривый;

радуйся, светоносный первопрестольник в
ней бывый.

Радуйся, святителю Петре, великий
чудотворче!

Кондак 6

Проповедал еси пастве твоей нелестное Евангельское учение, святителю приснопамятне, и всех учил еси мир имети между собою: мира любитель быв, враждовавших на тя в любовь привел еси кротостию и незлобием твоим, яко всей пастве твоей радоваться о тебе, и хвалебно зывать ко Господу: Аллилуия.

Икос 6

Возсиял еси в стране Российстей светом добрых дел твоих, святителю отче наш Петре, и еретическия плевелы не леностно искоренял еси в пастве твоей: чада твоя поучая православно веровати в триединого Бога, иже и нам внушает благохвалити тя звании сими:

Радуйся, столпе непоколебимый апостольских преданий;

радуйся, мечу обоюду острый, ереси посекаяй.

Радуйся, православия наставниче, всех поучавый троическому поклонению;

радуйся, еретиков противоборче, бодренно стоявый на страже святыя Христовы Церкви.

Радуйся, вдов и сирот милостивый питателю;
радуйся, обидимых и гонимых
нелицеприятный предстателю.

Радуйся, святителю Петре, великий
чудотворче!

Кондак 7

Хотя враг спасения человеческого нарушити
мир души твоея, святителю богоугодне,
воздвиги на тя клеветника ложного, Тверскаго
епископа Андрея, глаголавшаго на тя
праведнаго беззаконие. Обаче правда твоя, яко
солнце в полудне, возсия на соборе, клеветник
же злобный посрамлен бысть, и достойное по
делом своим получи, ты же благодарственно
взывал еси ко Господу: Аллилуия.

Икос 7

Ново место престолу твоему святительскому
избрал еси, угодниче Божий, во граде Москве:
возлюбив бо кроткаго и боголюбиваго ея князя
Иоанна, тамо поселился еси, и церковь каменну,
во имя Успения Пресвятыя Богородицы, тамо
соорудити князю Иоанну советовал еси,
пророчески глаголя ему, яко град той славен
будет, святители в нем поживут и Бог в нем

прославится, и яко кости твоя в нем положены будут. Сие пророчество твое исполншееся видяще, радостно приносим ти сия благохваления:

Радуйся, царствию Российскому основание крепкое положивый;

радуйся, первопрестольный град Москву благословением твоим освятивый.

Радуйся, прозорливче богопросвещенный, будущая, яко настоящая, провидевый;

радуйся, храм Пресвятыя Богородицы, честнаго и славнаго Ея Успения, основавый.

Радуйся, в нем гроб себе устроивый;

радуйся, свято и богоугодно на земли поживый.

Радуйся, святителю Петре, великий чудотворче!

Кондак 8

Странника и пришельца в мире сем себе помышляя святителю отче наш Петре, своима рукама гроб каменный себе устроил еси, и выну поминал еси о исходе твоём, к немуже

приуговлялся еси молитвами непрестанными,
зовый Богу во умилении сердечном: Аллилуия.

Икос 8

Весь в Бозе быв, час кончины твоея провидел
еси духом, отче Петре, и Божественную
Литургию совершив, о всех живых и усопших
помолился еси, себе же брашном негиблющим
Пречистых Христовых таин наплат еси, и
милостыню многу нищим и убогим раздал еси,
приуговляясь к сретению Жениха
Безсмертнаго Христа. Сие воспоминающе,
дивимся прозорливости твоей, и глаголем:

Радуйся, доброе напутствие для души твоей
приемый;

радуйся, со Христом жити на веки
возжелавый.

Радуйся, любовью божественною страх
смертный победивый;

радуйся, мирно и радостно час кончины
твоея сретивый.

Радуйся, яко праведно и непорочно течение
земное совершил еси;

радуйся, яко успение преподобное во мзду
трудом твоим, от Господа получил еси.

Радуйся, святителю Петре, великий чудотворче!

Кондак 9

Вси царедворцы великаго князя Иоанна собравшася к одру твоему, святителю Христов: ты же, чрез старейшаго из них Протасия, мир и благословение Божие великому князю Иоанну преподал еси, не бывшу тому во граде, и с светлым лицом воздев горе преподобней руце твои, усердно помолился еси, и тако в молитве Богу душу твою предал еси, юже ангелы святии в Горния Обители вознесоша, с пением радостным: Аллилуия.

Икос 9

Витии любомудрии прославляют славных мира сего деяния, мы же твоим житием честным красуемся, святителю Божий, и прославляем преставление твое святое и многая чудеса, тобою содеянная и содеваемая от рода в род: воистину бо не вотще чудотворец именуешься, преблаженне, и достойно слышиши хвалебныя песни таковыя:

Радуйся, в молитве усердной дух твой Богу предавай;

радуйся, погребением честным от великаго князя Иоанна почтенный.

Радуйся, во храме Богоматери у святого жертвенника положенный;

радуйся, видением дивным, неверовавшего в святость твою, в веру обративый.

Радуйся, со одра погребальнаго благословляющий паству твою виден бывый;

радуйся, во гробе тобою уготованном, мирно почивый.

Радуйся, святителю Петре, великий чудотворче!

Кондак 10

Спаса Христа умоляти не преставай за град и люди, ты почитающия, угодниче Божий, святителю отче наш Петре: тебе бо дарова нам Господь помощника и предстателя во всяких бедах и напастех, и гроб твой святой содела лечебницу безмездную недугов человеческих: к нему же с верою и любовью припадающе, вопием прославльшему ты и дивному во святых своих Богу: Аллилуия.

Икос 10

Стеною молитв твоих небесных,
первопрестольный град Москва благодатно
ограждается, и светло красуется, имея в себе
многоцелебную раку святых твоих мощей, Петре
чудотворче, яко крин нетлением процветших, и
благоухание святыни испускающих: имже
поклоняющися, умильно тебе глаголем:

Радуйся, смерть вкусивый, тления же не
познавый;

радуйся, исцеления многая от святых твоих
мощей источивый.

Радуйся, юношу разслабленного и
недвижимаго у гроба твоего здрава
возставивый;

радуйся, сляченного и отнюд восклонитися
немогшаго, таможе прямо ходити сотворивый.

Радуйся, глухому слух отверзый;

радуйся, слепому зрение милостивно
даровавый.

Радуйся, святителю Петре, великий
чудотворче!

Кондак 11

Пение молебное не молчно бысть при гробе твоём, святителю отче наш Петре, от дне честнаго преставления твоего до ныне, чудесем свидетельствующим святость твою, юже вся российская церковь исповедует ясно: мы же, чада твоя и овцы словесныя паствы твоея, радуящися о твоём прославлении на небеси и на земли, благодарственно вопием святых Святейшему Христу Богу: Аллилуия.

Икос 11

Светоподательный светильник Божия благодати, воистину являешия и по смерти, Петре чудотворче: темже, сиянием чудес твоих озаряеми, с любовию чествуем святую память, яко торжество веры и благочестия, и от усердия нашего приносим ти пения таковая:

Радуйся, апостолов во благовестии Христове не леностный подражателю;

радуйся, перваго иерарха Михаила достойный приемниче.

Радуйся, приемником твоим во святительстве добрый споспешниче;

радуйся, о всех людех российских усердный
молитвенниче.

Радуйся, правило веры истинныя и образе
кротости духовныя;

радуйся, врачу безмездный и целебниче
благосострадательный.

Радуйся, святителю Петре, великий
чудотворче!

Кондак 12

Благодать Господню и благовременну помощь
испроси нам, угодниче Божий, во дни
безпомощия нашего и буди нам в скорбех
утешитель, в бедах заступник, в недугех врач,
туне подаваяй нам дары целебныя от святых
твоих мощей, к ним же усердно притекающе, не
тщы отходим, но ущедреннии тобою вопием
Богу хвалебно: Аллилуия.

Икос 12

Поюще чудеса твоя и многое сострадание
твое к людем, отче наш Петре, усердно просим
твоего многомощнаго ко Господу
предстательства: вемы бо, яко молитва твоя,
подобно фимиаму восходит пред Вседержителя

Бога, и низводит на нас Его благословение,
помощь и милость. Темже и взываем к тебе:

Радуйся, Пресвятая Троицы верный
исповедниче;

радуйся, Пресвятая Богородицы изрядный
служителю.

Радуйся, Ангельских воинств собеседниче;
радуйся, всех святых присный друже.

Радуйся, от горних высот к земнородным
милостиво приникаяй;

радуйся, души и телеса наша благоутробно
врачуяй.

Радуйся, святителю Петре, великий
чудотворче!

Кондак 13

О чудотворче преславный и помощниче всем
нам скорый, и милостивый, святителю отче наш
Петре! Милостиво прием сие малое моление
наше, в похвалу тебе приносимое, умоли Господа
Бога даровати нам телесное здравие и душевное
спасение, да во Царствии Небеснем сподобимся
пети Ему со святыми: Аллилуия.

Этот кондак читается трижды, затем икос 1 и кондак 1

Молитва

О великий святителю, преславный чудотворче, Российския Церкви первопрестольниче, града Москвы хранителю и о всех нас усердный молитвенниче, отче наш Петре! К тебе смиренно припадаем и молимся: простри руце твои ко Господу Богу, и помолися за ны грешныя и недостойныя рабы Его: да пробавит нам милость Свою и низпослет нам вся благопотребная к временному житию и вечному спасению нашему дары благодати Его, наипаче же, да оградит нас миром, братолюбием и благочестием от всех искушений врага диавола, и дарует нам быти верными чады твоими, не по имени токмо, но и всем житием нашим. Молим тя, святителю Христов, проси предстательством твоим у Небеснаго Владыки: страждущую страну Российскую в мире сохранить. Ей, угодниче Божий! Услыши нас благоутробно, и буди нам помощник и заступник во всяких бедах и напастьх, не забуди нас и в час кончины нашея, егда наипаче твоего заступления потребуем, да при помощи молитв твоих святых,

сподобимся и мы грешнии, кончину благую
получить и Царствие Небесное унаследить,
славяще дивнаго во святых Своих Бога нашего,
Отца, и Сына, и Святаго Духа, во веки веков.
Аминь.



ПОЛНЬІЙ АКАФИСТНИК КАНОНИЧЕСКІЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

I

НОВОЕ
* НЕБО